




三國志辨疑

1 普4
604
21 28

44





三國志魏



三國志辨疑



三國志辨疑序

陳承祚三國志創前人未有之例懸諸日月而不刊者也魏氏據中原日久而晉承其禪當時中原人士知有魏不知有蜀久矣自承祚書出始正三國之名且先蜀而後吳又於楊戲傳末載季漢輔臣贊媿媿數百言所以尊蜀殊於魏吳也有季漢之名者明乎蜀之實漢也習鑿齒作漢晉春秋不過因其意而推闡之而後之論史者輒右習而左陳毋乃好爲議論而未審乎

三國志卷之五
時勢之難易乎夫晉之祖宗所北面而事者魏也蜀之滅晉實爲之吳蜀旣亡羣然一詞指爲僞朝乃承祚不惟不僞之且引魏以匹二國其秉筆之公視南董何多讓焉而晉武帝不以爲忤張茂先且欲以晉書付之其君臣度量之宏高出唐宋萬萬豈非去古未遠三代之直道猶存故承祚得以行其志乎厥後琅邪纂統卽仿漢中承制之局鑿齒建議祧魏而承漢直易易耳考亭生於南宋事勢與蜀漢相同以蜀爲正

固其直矣然吾所以重承祚者尤在敘事之可信蓋史臣載筆事久則議論易公世近則見聞必確三國介漢晉之間首尾相涉垂及百年兩史有違失者往往賴此書正之如郝慮華歆均爲御史大夫而慮爲漢臣歆爲魏臣魏紀書歆不書慮是也漢獻紀書慮兼書歆非也吳志言劉熙作釋名後漢書以爲劉珍作亦陳是而范非也蔚宗號稱良史然去東京歲月遙遠較之承祚則傳聞之與親覩固不可同年而語矣若

晉書修於唐初時代益後逸隔又雜出眾手非專門之業其罅漏百出奚足怪哉予性喜史學馬班而外卽推此書以爲過於范歐陽而裴氏注遮羅遺佚尤爲陳氏功臣所恨意存涉獵不能專方予弟晦之孜孜好古實事求是所得殊多於予其用力精勤雖近儒何屺瞻陳少章未能或之先也鈔撮甫畢屬予點次喜而序之時丁巳歲冬月兄竹汀居士大昕書

三國志辨疑自序

史有二體紀傳編年是也紀傳中有二體陳氏三國志李氏南北史之與諸史是也諸史中班書約而仍明略而勿陋敘事最爲肅括蔚宗史才已不逮古而自稱體大思精自古未有者蓋謝承華嶠司馬彪諸書竝在范前取資旣多用功益密又因而非創易於措辭也陳承祚之於三國疆宇鼎立地醜德齊兼之互相詆毀各自誇張斯其載筆誠難折中又列國雖有史錄多

詳魏而略吳華曹而陋蜀其匯而修成一史者
承祚為創是以用力尤難乃能彙實錄小說家
之所言有條不紊類事無頗宜乎時人稱其善
敘事有良史才范頴等表稱辭多勸戒明乎得
失有益風化而夏侯湛張華輩並相推重也裴
世期鳩集羣籍以注此書其所徵引於漢有華
嶠謝承後漢書司馬彪續漢書張璠袁彥伯後
漢紀劉艾靈帝紀獻帝紀袁思光獻帝春秋樂
資山陽公載記孔衍漢魏春秋習鑿齒漢晉春

秋獻帝起居注獻帝傳於蜀有譙周蜀本紀王
隱蜀紀孫盛蜀世譜於魏有王沈魏書吳人曹
瞞傳郭頒魏晉世語孫盛魏氏春秋魏世譜魏
世籍魚豢魏略陰澹魏紀卍邱儉志紀魏武故
事魏名臣奏於吳有張勃吳錄胡冲吳歷章昭
吳書環濟吳紀於晉有王隱虞預晉書于寶晉
紀習鑿齒晉陽秋孫盛晉陽秋陸機晉惠帝起
居注又李軌泰始起居注傅暢晉諸公贊於地
理有司馬彪九州春秋荀綽九州紀虞預會稽

典錄趙岐三輔決錄摯虞三輔決錄注常璩華陽國志王範交廣二州春秋王隱交廣記左思蜀都賦魏都賦庾闡揚都賦太康三年地記襄陽記於人物有皇甫謐帝王世紀高士傳逸士傳列女傳魏文帝列異傳王粲英雄記張隱文士傳葛洪神仙傳周斐汝南先賢傳張方楚國先賢傳陳壽益部耆舊傳陳術益部耆舊雜記蘇林陳留耆舊傳虞溥江表傳零陵先賢傳先賢行狀漢末名士傳魏末傳於官制有山濤啓

事無名氏晉百官名志晉百官表褒賞令於雜書有顧愷之啓蒙注晉武帝中經簿荀勗晉中經簿張儼默記張華博物志東方朔神異記楊孚異物志干寶搜神記傅休奕傳子葛洪抱樸子袁準袁子劉向說苑新序衛恆四體書勢序殷基通語陸氏異林應璩書林虞喜志林司馬彪戰略應劭風俗通徐眾三國評孫綽評蔣濟萬機論孫盛異同評異同雜記魏文帝典論決疑要注於文章有摯虞文章志荀勗文章敘錄

於別集有孔融高貴鄉公陳思王植嵇康石崇
潘岳諸葛亮姚信王朗傅咸張超等集於家傳
有王朗傅暢荀氏廬江何氏會稽邵氏等族又
有杜氏新書山濤行狀袁氏世紀裴氏家記陸
氏世須陸氏祠堂像贊於譜牒有孫氏嵇氏劉
氏王氏諸葛氏庾氏阮氏孔氏陳氏郭氏崔氏
諸譜於別傳有濟北王志鄭康成荀彧禰衡邴
原吳質劉廙任嘏孫資王弼嵇康華佗管輅趙
雲費禕虞翻諸葛恪荀勗程曉潘岳潘尼孫惠

顧譚盧諶鍾會母張氏陸機陸雲諸家外此羣
經傳注倉雅訓詁方言土語諸子百家之說無
與史事而引以詮釋字句者又不下數十種夫
世期引據博洽其才實能會通諸書別成畦町
若依後世新唐書五代史之例可自作一史與
承祚方軌並駕乃不自爲而爲之注者謙也竊
嘗論之注史與注經不同注經以明理爲宗理
寓於訓詁訓詁明而理自見注史以達事爲主
事不明訓詁雖精無益也嘗怪服虔應劭之於

漢書裴駟徐廣之於史記其時去古未遠稗官載記碑刻尙多不能會而通之攷異質疑而徒妄妄於訓詁豈若世期之博引載籍增廣異聞是是非非使天下後世讀者昭然共見乎予舊於兩漢書有辨疑四十四卷於地理官制頗有所得名儒碩士時或許之近日復於三國志輯錄得三卷仍倣漢書辨疑例不敢立議論以測古今不敢妄褒貶以騁詞辨而其詳略不能與漢書盡同者蓋史事藉注證而申兩漢之注簡

簡則易滋疏略三國之注博博則疑義鮮存有無待辨證而明焉者也雖然校書如掃落葉隨掃隨積以予之見聞有限無論志中罅隙更俟補苴卽拙著內亦豈無紕繆待指者漢書刊誤所望吳斗南爲之補遺云乾隆五十八年六月嘉定錢大昭書於濟南客舍

三國志辨疑卷一
 魏武帝紀
 漢相國參之後
 按漢郃陽令曹全碑以曹參
 為出自曹叔振鐸以國為氏魏武作家傳自
 云曹叔振鐸之後故陳思王作武帝誄云於
 穆武王胄稷嗣周魏武與曹參同是沛人其
 為參後似無疑矣然洪适所載費亭侯曹騰

三國志辨疑卷一

嘉定錢大昭晦之撰 孫男師璟賦梅謹刊

魏

武帝紀

漢相國參之後 按漢郃陽令曹全碑以曹參
 為出自曹叔振鐸以國為氏魏武作家傳自
 云曹叔振鐸之後故陳思王作武帝誄云於
 穆武王胄稷嗣周魏武與曹參同是沛人其
 為參後似無疑矣然洪适所載費亭侯曹騰

碑又云曹氏族出自邾則與王沈魏書所云以姓為氏之說同矣

初平二年東郡王肱不能禦土按東郡下當有

太守二字

袁紹因表太祖為東郡太守治東武陽按東

郡本治濮陽曹公改治故特書之臧洪為東

郡太守亦治東武陽

三年司徒王允與李布共殺卓李當作呂

興平二年天子拜太祖兗州牧按初平三年

鮑信與州吏萬潛等至東郡迎太祖領兗州牧蓋權之耳至是為真

建安元年張濟死從子繡領其眾張繡傳繡

驃騎將軍濟族子

四年遣劉岱王忠擊之按此沛國劉岱亦字

公山非劉繇兄也東萊劉岱卒于建安三年

五年紹騎將文醜與劉備將五六千騎前後至

諸將擊破之斬醜良按斬顏良事在上文

此當云斬醜不當及良因下有醜良二字而

誤

十六年遂與韓遂楊秋李塽成宜等叛 按

下文云斬成宜李堪等馬超傳亦作李堪則塽

字誤也

遣信求割河以西請和 信謂使者也史記韓

世家陳軫說楚王發信臣多其車重其幣司

馬相如論巴蜀檄故遣信使曉諭百姓

公與遂父同歲孝廉 同歲即今所謂同年也

十九年但更事多耳注使行太常事大司農安

陽侯王邑 按策命魏公注亦引獻帝起居

注作安陽亭侯此注疑脫亭字

二十三年代郡上谷烏丸無臣氏等叛 無臣

氏即疑能臣氏烏丸傳但云代郡不言上谷

疑衍上谷二字

二十四年以夫人卞氏為皇后 按是時太祖

為魏王當作王后文帝紀云太祖崩嗣位為

丞相魏王尊王后為王太后是其證也

文帝紀

文皇帝諱丕 按文帝為高祖明帝為烈祖見於景初詔中承祚於文明二紀俱削而不書蓋德不相副且功無可錄何以言祖此史筆之謹嚴也

皆各遣使奉獻注少府謝與萬潛 萬潛疑卽萬潛見武帝紀

以肅承天命注給事黃門侍郎王毖董遇等言董遇字季直見王朗傳王毖未詳

注日載東絕火光 按說文瞽獄之兩瞽也在

廷東从白徐鍇曰以言辭治獄故從白識文以日為日此俗儒之誤

注五八四十黃氣受真人出 言漢祚四百餘年運數已絕當有黃氣受之

注鬼在山禾女連 古魏字作巍故有是說也說文巍从嵬委聲漢人作魏字或姓或郡皆有山字見於洪氏隸釋者不可勝計

注給事博士騎都尉蘇林董巴等 蘇林見劉劭傳注

注是芝所取中黃運期姓緯之讖 緯當作諱
注侍御史鄭渾羊祕鮑勛武周等 渾勛自有
傳武周字伯南見胡質傳注羊祕未聞

黃初四年月犯中央太星注故分命猛將三道
並征 按三道謂曹休張遼臧霸出洞口曹
仁出濡須曹真夏侯尚張郃徐晃圍南郡也
又云今征東諸軍謂征東大將軍曹休又云
大司馬據守濡須謂曹仁也又云中軍征南
攻圍江陵謂中軍大將軍曹真征南大將軍

夏侯尚也

行幸許昌宮注賜山陽公夫人湯沐邑公女曼
為長樂郡公主 按是時獻帝為郡公其女
安得為郡主且郡亦無長樂之名此郡字疑
或鄉或亭之譌

明帝紀

故未建為嗣注有意欲以他姪子京兆王為嗣
京兆王禮徐姬之子也

撫軍大將軍司馬宣王為驃騎大將軍 按太

和元年詔驃騎將軍司馬宣王討之四年驃騎將軍司馬宣王為大將軍驃騎下無大字

疑衍文

太和元年秋八月夕月於西郊 按晉志八月

下應有己丑二字

三年繁陽王穆薨 按明帝子有清河王問繁

陽王穆安平哀王殷 追封 雖曰早薨然既有

封地自可於王公傳中備書今傳中但載武

文不及明帝者以宮省事祕莫知其所由來

亦猶班史於孝惠後宮子三王三侯不書於

表傳中也

四年十一月太白犯歲星 脫書日晉志作壬

戌

六年春二月 按晉書天文志太和六年正月

戊辰朔日有蝕之見吳歷又正始元年七月

戊申朔三年四月戊戌朔六年四月壬子朔

十月戊申朔九年正月乙未朔嘉平元年二

月己未朔甘露四年七月戊子朔景元三年

十一月己亥朔晉志竝云日有蝕之史皆失書

青龍元年詔祀故車騎將軍程昱按車騎將軍是程昱追贈之官生時止為衛尉

慎勿越塞過句注也按句注山名在今代州西二十里

二年葬以漢禮注使使持節行司徒太常和洽弔祭又使持節行大司空大司農崔林監護喪事按是時不遣司徒董昭司空陳羣自

往山陽而但以太常大司農行其禮未免有名無實矣司空上大字疑衍

景初元年有司奏帝制作興治為魏烈祖樂用章武之舞三祖之廟萬世不毀按禮祖有功而宗有德當於身後定之詎有生為魏主而有司遂豫議為烈祖邪陳矯衛臻之徒不學無識乃至於此

營洛陽南委粟山為園丘注四百餘年廢無禘祀晉書禮志作禘禮

二年帝曰司馬懿臨危制變 按司馬懿三字當是後人追改壽為晉臣無不避諱之理若以為史述帝語不得不書其名則如齊王芳詔曰太尉體道正直何獨非帝語而稱其官乎以此知壽之本文亦是稱其官也

齊王芳紀

其以太尉為太傅 按太尉即司馬宣王也因詔書中不便稱為司馬宣王故不書姓名他如甘露五年使使持節行中護軍中壘將軍

司馬炎北迎常道鄉公璜咸熙元年命中撫軍司馬炎副貳相國事又以中撫軍司馬炎為撫軍大將軍又命撫軍大將軍新昌鄉侯炎為晉世子又晉太子炎紹封襲位並是後人追改

以鎮南將軍黃權為車騎將軍 按車騎將軍特書除授始見於此而前此曹仁張郃不知何以不書

正始四年立皇后甄氏 按齊王后甄氏及高

貴鄉公后卞氏陳留王后卞氏竝位列中宮
母儀天下自應作傳然三少帝歷年未久享
位不終皇后亦無事可紀故止於文昭甄后
武宣卞后傳未附見之

五月朔日有食之既 晉志作五月丁丑朔

五年四月朔日有食之 脫丙辰二字 晉志作景辰避

諱

六年以右光祿大夫孫資為衛將軍 按衛將
軍特書除授始見於此是後惟胡遵為衛將

軍書之於紀此外如司馬景王文王及司馬
望竝為此官吏不備書

八年二月朔日有蝕之 當據晉志補庚午二
字

散騎常侍諫議大夫孔宴父奏曰 按孔宴父
當作孔父倉慈傳注引孔氏譜云孔父字元
儁為散騎常侍上疏規諫是紀中衍宴字也
下文云晏父咸因闕以進規諫蓋合上文何
晏所奏言之

嘉平三年以征南將軍王昶為征南大將軍
按征南大將軍特書除授唯見於此而前此
之夏侯尚何以不書

高貴鄉公紀

正元五年正月朔日有食之 當據晉志補乙

酉

散騎常侍王業注國語曰 國語誤疑世語通

語之譌晉襄陽令郭頌作魏晉世語吳零陵
太守殷基作通語

陳畱王紀

景元二年五月朔日有食之 晉志丁未朔

四年十二月癸丑特赦益州士民復除租賦之

半五年乙卯以征西將軍鄧艾為太尉 按

復除租賦之半五年者謂五歲之內每歲租

賦盡復除其本也癸丑與乙卯僅隔一日汲

古閣本以五年提行非也景元無五年 文獻通考

國用門引此條不連五年二字知宋本已誤

后妃傳

及踐阼尊后曰皇太后稱永壽宮 按文帝紀
注延康元年十一月已有永壽少府毛宗則
永壽宮之稱不自文帝踐阼始矣
明帝乃追謚太后祖父廣曰開陽恭侯父遠曰
敬侯祖母周封陽都君及恭侯夫人皆贈印
綬 按太后當作太皇太后恭侯夫人當作
敬侯夫人又失書其姓下后之祖父與父明
帝既追封為縣侯則后之祖母與母竝當追
封為縣君況上云祖母即恭侯夫人矣不應

重複言之其為敬侯之誤無疑

子暉嗣注時帝信巫女用水方 巫女即青龍

三年壽春農民妻也

明悼毛皇后河內人也 按明悼毛皇后明元

郭皇后皆書郡不書縣非史例也

董卓傳

中常侍段珪等 李賢曰山陽公載記段字作

殷

用其所舉韓馥劉岱孔伷張資張邈等 按張

資范書卓傳及吳志孫破虜傳竝作張咨李賢曰獻帝春秋咨作資

主簿田景前趨卓尸田景范書作田儀李賢曰九州春秋儀字作景

相攻擊連月注天子使左中郎將李固持節拜催為大司馬范書卓傳注引作李國

汜為其將五習所襲後漢書作伍習五伍古字通左氏傳伍參漢書人表作五參

袁紹傳

稍遷中軍校尉中軍范書作佐軍李賢引山陽公載記亦作中軍

乃讓紹注雖有張楊於浮羅新附張楊傳作於夫羅浮夫聲相近

備奔紹注獎賊威柄文選同李善曰賊成也范書賊作就

注故復援旌環甲范書旌作旂旂即旌字下文注云何寤青蠅飛于干旂范書作竿旌

尙自將兵助譚與太祖相拒於黎陽自二月至

九月大戰城下譚尙敗走入城守太祖將圍之乃夜遁 按范書作自九月至明年二月攷武帝紀建安七年譚自號車騎將軍屯黎陽秋九月公征之八年春三月拔其郭大破之譚尙夜遁據此則范史爲是此傳誤也 至黎陽注未若文公之忿曹 文公當從范書作太公

注當唯義是務 義范書作曹爲是 注乃議曲直之計 計當从范書作評

注復能勦力爲君之役哉 爲君范書作仁君當從之

注季友歔歔而行鍼叔之鳩 鍼叔左氏傳作鍼季范書作叔牙之誅

注昔先王廢紕將軍以續賢兄 先王當作先公

尙還走濫口 范書作藍口李賢曰相州安陽縣界有藍嵯山與鄴相近蓋藍山之口

袁術傳

皆服綺縠餘梁肉注司隸馮方女 按馮方疑

即馮芳中平五年初置西園八校尉以芳為

助軍右校尉見靈帝本紀及袁紹傳注此作

馮方疑誤

注諸婦如其寵語之曰 語當從後漢書術傳

作給依說文解字當作詒詒相欺詒也列子

黃帝篇既而狎侮欺詒郭璞注方言云汝南

人呼欺為譏詵亦曰詒史記高祖本紀高祖

為亭長素易諸吏乃給為謁應劭曰給欺也

音殆蓋借用絲勞即給之給耳

奔其部曲雷薄陳蘭於灑山 陳蘭范書術傳

作陳簡

劉表傳

少知名號八俊注公褚恭 後漢書黨錮傳作

公緒恭李賢曰公緒姓也此作公褚誤廣韻

一東作山陽公堵恭亦誤

治中鄧羲諫表 後漢書作侍中從事非也時

州牧有長史有別駕有治中至侍中乃中朝

官非劉表所得有也

呂布傳

張邈字孟卓東平壽張人也 按范書張邈事
即附在呂布傳中故張邈之前布事未終張
邈之後仍敘布事且其作贊言布不言邈大
略與魏志同蓋蔚宗因承祚之舊故也魏志
本以張邈陳登附布傳以陳容附臧洪傳後
之校書者見有張邈字孟卓東平壽張人也
十一字不及細檢輒於卷首改題云呂布張

邈臧洪傳而於目錄則云張邈 陳登臧洪 陳
容皆誤

與布戰與濮陽下與字當作於

太祖攻圍數月屠之斬超 按武帝紀云雍邱

潰超自殺則張超非為魏武所斬也

布自稱徐州刺史注昔將金元休向兗州甫詣

封部 按封部當從范書作封邱

注尚獻帝初為兗州刺史東之郡 郡當作部

於是暹奉從之勳大破敗注二將軍拔大駕來

東 按拔當從范書作扶

其將侯成宋慮魏續縛陳宮將其眾降 按裴

注引英雄記中魏續凡三見此作續疑誤武

帝紀作宋憲魏續憲與慮形相涉而譌

公孫瓚傳

日南鄣氣或恐不還 范書作日南多瘴氣

除遼東屬國長史 按續漢書云每郡置太守

一人丞一人郡當邊戍者丞為長史每屬國

置都尉一人丞一人屬國長史即屬國丞耳

不知何時改此制

陶謙傳

字恭祖丹陽人 按郡縣兼書史之例也志於

魏陶謙張楊徐奕倉慈呂虔杜夔朱建平周

宣管輅蜀張飛黃忠龐統孫乾簡雍伊籍陳

震呂乂彭素李嚴劉威碩魏延楊儀王連許

慈張紘嚴畯劉惇趙達吳濮陽興王蕃皆書

郡不書縣此例之未密也

除盧令 注引吳書以為除舒令與志不同攷

張子布哀辭云令舒及盧遺愛于民是謙於二縣竝為令也

是歲謙病死注憬憬夷貊賴侯以清用詩憬

彼淮夷也韓詩憬作獷薛君曰獷覺悟之兒

張楊傳

單于執楊與俱去紹使將麴義追擊於鄴南破

之單于執楊至黎陽按上既云單于執楊

矣下何必重複言之至黎陽上執楊二字疑

衍

卓以楊為建義將軍按英雄記云楊及部曲

諸將皆受催汜購募共圖布圖布者為董卓

既誅故催汜等欲殺呂布為卓復仇也是時

催汜等用事以楊為建義將軍必非董卓明

矣

公孫度傳

悉斬送彌旻等首注校尉裴潛此又是一人

非河東裴文行也

侵擾北方注理而掘之古人所恥理當作埋

宣王遣將軍胡遵等擊破之 胡遵安定人見

鍾會傳注

張燕傳

張燕常山真定人也 按承祚志中張燕張繡

典章朱建平劉封皆不書表字

張繡傳

封宣威侯 續漢志武威郡有宣威縣或疑為

鄉亭之屬非也

太祖軍敗二子沒 按一子謂豐愍王也其

一子武帝紀以為弟子安民則非皆武帝子矣

張魯傳

雄據巴漢垂三十年注請禱之法書病人姓名
說服罪之意作三通其一上之天著山上其
一埋之地其一沈之水謂之三官手書 此
三官之始也道藏書以為唐宏葛雍周實三
人並無實據

注臣松之謂張脩應是張衡 按張魯本傳魯

卽張衡之子又云益州牧劉焉以魯爲督義
司馬與別部司馬張脩將兵擊漢中太守蘇
固典略所云漢中張脩卽劉焉之別部司馬
亦習五斗米道後漢書靈帝紀所謂巴郡妖
巫是也安得以張魯之父當之裴說非是
不如依杜灌朴胡相距 按灌當從武帝紀及
黃權傳作濮朴胡人姓名巴七姓夷王也胡
嘗爲巴東太守

夏侯惇傳

乃敢執劫大將軍復欲望生邪 按是時惇爲
折衝校尉非大將軍也惇爲大將軍在文帝
卽王位之後安得先以大將軍稱之大字疑

衍

由是劫質者遂絕注沒教陵遲 沒當作政
惇乃斷太壽水作陂 按初平四年袁術走襄
邑追到太壽決渠水灌城卽其處也
太祖軍擊破呂布軍於摩陂 按所擊破者盪
寇非呂布也布受誅於建安三年至二十四

年安得尙存乎

浩至中護軍渙至中領軍皆掌禁兵 按護軍

領軍皆魏武丞相府自置非漢官也建安十

二年改護軍爲中護軍領軍爲中領軍置長

史司馬

夏侯淵傳

十四年以淵爲行領軍 按此十四年卽建安

十四年也疑脫建安二字

曹仁傳

太祖征呂布仁別攻勾陽拔之 勾陽疑卽句

陽屬濟陰郡在今曹州府城北二十里布在

下邳未必有別將在句陽疑是曲陽之誤曲

陽在今淮安府安東縣西北

督諸將拒潼關破超 諸將謂夏侯淵鍾繇也

將士感之皆無二 二下疑脫心字

曹真傳

張進等反於酒泉真遣費耀討破之 按費耀

明帝紀云諸葛亮圍陳倉曹真遣將軍費曜

三原新考 卷一
等拒之張既傳及晉書宣帝紀作曜諸葛亮
傳注作耀者一作曜者二未知孰是

以真爲上軍大將軍都督中外諸軍事假節鉞
按光武建武初征伐四方權置督軍御史
事竟罷之建安中魏武爲丞相始遣大將軍
督之如夏侯惇督二十六軍是文帝始有都
督諸州軍事如曹仁都督荆揚益州諸軍事
曹真都督雍涼州諸軍事臧霸都督青州諸
大軍事是也至都督中外諸軍事則總統內外

兵旅嗣後司馬氏父子竝加大都督而權愈
重矣

曹爽傳

夷三族注張魯前爲鎮北將軍 按魯傳爲鎮

南將軍北字疑誤

注廳事前屠蘇壞 風俗通義云平室曰屠蘇

亦作屠蘇廣雅屠蘇菴也

夏侯太初傳

緬緬紛紛未能整齊 按呂刑泯泯夢夢孔傳

以泯泯為亂逸周書祭公解云泯泯芬芬漢書敘傳云涵涵紛紛說文無泯字因泯涵聲既相近義又相同已收涵字故不收泯字也詩緜緜其庶韓詩作民民

荀彧傳

太祖征陶謙任彧留事按留事者猶下文云留知後事也是時彧與程昱同守鄆城國淵傳太祖征關中以淵為居府長史統留事徐奕傳太祖征孫權徒為留府長史謂奕曰今

使君統留事孤無還顧之憂也

分以十分居一之眾分當從范書彧傳作公

太祖遂為魏公矣注其次有之有當作友

而與夏侯尚不穆按穆與睦通大雅穆如濤

風鄭箋穆和也

咸熙中為司空注傳嘏往嘑粲嘑疑當作嘑

弔生曰嘑

賈詡傳

謂詡有長平之奇注屠三十六萬方星衍萬字

注德威震本朝風馳海外後漢書皇甫嵩傳
風下有聲字當從之

語在卓傳注當是時元惡既梟天地始開致使
厲階重結大梗殷流豈不由賈詡片言乎詡
之罪也一何大哉按裴說誠是然李傕郭
汜樊稠張濟之徒皆董卓黨羽渠魁既伏其
辜餘眾方免死之不暇敢有他志自王允有
一歲不可再赦之議且欲盡誅涼州人于是
李傕等遂蟻聚蜂屯至於敗壞不可收拾卒

之允既誅死漢遂以亡故吾謂漢室之亡不
亡于賈詡而亡于王允之一言也允雖有誅
卓之功實為漢室之大罪人矣

王脩傳

膠東人公沙盧宗彊廣韻有恆農令北海公

沙穆膠東亦北海所屬

郟原傳

原從行卒注河南張範名公之子也按範河

內脩武人此作河南誤

管寧傳

雖有素履幽人之貞 按易履道坦坦幽人貞
吉虞翻謂履自訟來時二在坎獄中故稱幽
人之貞惠棟曰幽人幽繫之人尸子曰文王
幽于羑里荀子曰公侯失禮則幽俗謂高士
為幽人非也

永寧衛尉孟觀 明元郭皇后為太后稱永寧

宮故設衛尉

青龍四年辛亥詔書張掖郡元川溢洄激波奮

蕩寶石負圖狀像靈龜宅于川西 四年下

有日無月史肱文宋書符瑞志作三年又云

廣一丈七尺一寸圍五丈八寸立于川西

自相約誓言胡居士賢者也 按禮記玉藻云

居士錦帶弟子縞帶鄭注居士道藝處士也

居士與弟子對文則居士當有師表可為矜

式者稱人為居士昉此

崔季珪傳

唯世子燔翳捐褶以塞眾望 晉書輿服志云

袴褶之制未詳所起近世凡車駕親戎中外
戒嚴服之又云大戟一隊九尺楯一隊刀楯
一隊弓一隊弩一隊隊各五十人黑袴褶
皆以恃舊不虔見誅注雖有功臣亦未必非茲
輩胥付之由也 按胥付當作胥附此用詩
子曰有疏附也胥疏聲相近
徐奕傳 大夫以七十國止人八百里長
拜諫議大夫卒注詔以其族子統爲郎 郎下
當有中字見文帝紀

何夔傳

遷長廣太守郡濱山海 按郡國志長廣屬東
萊郡晉地理志宋州郡志皆有長廣郡並言
咸寧三年置晉領不其長廣挺三縣宋領四
縣三縣之外又有昌陽也今讀此傳乃知建
安初已有此郡不知省自何時而咸寧中復
置諸史並未志其沿革疏矣 具州志
封成陽亭侯 晉書何曾傳作陽武亭侯
司馬芝傳

歷甘陵沛陽平太守 陽平郡黃初二年以魏

郡東部置

南陽圭泰 古未見有圭姓或是州泰之譌州

泰南陽人見鄧艾傳

鍾繇傳

潁川長社人也注膺之姑為皓兄之妻生子觀

與膺年齊 按觀後漢書鍾繇傳作瑾

潁川黃述之孫 按後漢書云皓孫繇建安中

為司隸校尉注引海內先賢傳云繇郡主簿

迪之子也裴以為迪孫疑誤

楷茲度矩注近見南陽宗惠叔 疑是宗承見

荀攸傳注

華歆傳

乃遣散騎常侍繆襲 襲東海人見劉劭傳

臣備為宰相老病日篤 為疑當作位時歆為

司徒故得稱宰相

表咸熙中為尚書注昆字敬倫 晉書昆作混

王朗傳

三國志游疑

卷一

庚

浮晦至東治 按東治當作東治魏志倭國傳
云計其道里當在會稽東治之東孫策傳屠
東治亦譌爲治續漢志云章安故治脫東字 閩
越地光武更名然范書鄭巨君傳云舊交趾
七郡貢獻轉運皆從東治汎海而至巨君章
帝時人則後漢本稱東治司馬彪所據者順
帝時之版籍改爲章安或在安順時而其後
復舊名也
詰讓而不害注獨與老母共乘一櫂流矢始交

便棄櫂就俘 按玉篇櫂小船也予謂櫂卽
檣也楊雄方言凡船大者謂之舸小舸謂之
艇東南丹陽會稽之間謂艇爲檣時朗爲會
稽太守故謂之檣
進封樂平鄉侯注學官博士七千餘人 按博
士下當有弟子二字

王肅傳
兼崇文觀祭酒 青龍四年置崇文觀徵善屬
文者充之

九龍可以安聖體 按九龍殿即崇華殿也因

災而改名 按廣平郡黃初二

正始元年出為廣平太守 按廣平郡黃初二

年以魏郡西部置

是歲白氣經天 按晉書宣帝紀白氣經天在

正元元年十一月此云嘉平六年者蓋高貴

鄉公以是年十月改元也

程昱傳 按舉昱當

備至徐州遂殺車胄舉昱背太祖

作舉兵武帝紀遂殺徐州刺史車胄舉兵屯

沛

闔門不出注眾之者曰軍事有專無請 按文

義疑當作眾人皆曰形相涉而譌

時校事放橫 按程曉以為校事之官魏武特

置然孫吳亦有校事呂壹操弄威柄丞相以

下皆畏憚之豈一時弊政彼此亦相倣效乎

以諛詞為賢能 范書鄧和熹后紀云輕薄諛

詞李賢注諛詞猶息遽也又魏志臧霸傳云

部從事諛詞不法

董昭傳

紹聞之使昭領鉅鹿 以下文紹以昭領魏郡

太守例之則鉅鹿下當有太守二字

因敵取資事必克捷若其無臣不須為念 按

無臣疑當作無成

劉子揚傳

明公以步卒五千將誅董卓 按武帝紀中平

六年十二月始起兵於巳吾裴注引郭頌世

語曰陳畱孝廉衛茲以家財資太祖使起兵
眾有五千人此云步卒五千蓋指初起兵言
之或謂記述者欲以少見奇非其實錄斯不
然矣

蔣濟傳

太祖以漢帝在許近賊欲徙都 時欲徙河北

見晉書宣帝紀

弊劫之民 劫居偽切

劉放傳

三國志卷一

卷一

完

漢廣陽順王子西鄉侯宏後也 按漢書王子

侯表有西鄉侯容廣陽頃王子順當作頃宏

當作容放子名宏西鄉雖遠祖不當同名宏字之誤顯然

抑辛毗而助王思 王思事見梁習傳魚豢典

略入之苛吏

劉馥傳

後孫策所置廬江太守李述 按荀彧傳注作

李術述術古字通

時天連雨城欲崩於是以苦葺覆之 古有葺

城之法春秋定公元年公羊傳曰仲幾之罪

何不葺城也何休曰若今以艸衣城也

蓋由博士選輕諸生避役高門子弟恥非其倫

故無學者 按典略儒宗傳敘云太和青龍

中中外多事人懷避就雖性非解學多求詣

太學太學諸生有數千而諸博士率皆荒疏

無以教子弟子弟本以避役竟無能習學冬

來春去歲歲如是學校如此廢弛已極劉靖

所以有此疏也

子熙嗣注宏與晉世祖同年居同里 按晉武

帝河內温人劉宏沛國相人此云同里者謂

同居雒陽之永安里也

注吾統荊州十郡安得十女壻然後為治哉

按郡國志荊州七郡此多三郡疑是魏興新

城上庸耳

注宏有劉昇升保有江漢之志 昇疑當作景

司馬朗傳

河內温人也注朗祖父儁 晉書宣帝紀作儁

卿言有意注而也便云吾亦悟之 也當作卓

初朗初與俱徙趙咨 下初字疑衍

張既傳

出為雍州刺史 建安十四年始置雍州別典

四郡見龐涓傳注

又與夏侯淵宋建別攻臨洮狄道平之 按夏

侯淵傳云初枹罕宋建因涼州亂自號河首

平漢王太祖使淵帥諸將討建既即諸將之

一也宋建上當有討字

課使治屋宅作水碓水碓不見前史當是張

既所創

燉煌張恭周生列等列當作烈周生姓烈名

見何晏論語集解

稍遷東莞太守按臧霸傳尹禮為東莞太守

在建安初張緝胡質為東莞太守竝在明帝

時則此郡之設由來已久晉志謂太康元年

分琅邪置誤矣

溫恢傳

入為丞相主簿此即刺姦主簿也見孫禮傳

恢為兗州刺史裴潛曰按是時恢為揚州刺

史未必兼為兗州攷裴潛傳潛曾為兗州刺

史為當作謂

賈逵傳

是時州軍在項按郡國志豫州刺史治沛國

譙縣魏武分沛立譙郡故改治汝南項縣逵

有功德於豫州故州人立碑像於項

任峻傳

任俊字伯達 俊當作峻

蘇則傳

則餒定下辯諸民 餒當作綬

杜畿傳

除漢中府丞 按續漢志每郡置太守一人丞

一人孫禮傳後除河間郡丞諸葛亮傳父珪

為太山郡丞馬忠傳郡丞朱衰反何夔傳乃

遣郡丞往為陳成敗倉慈傳注時為恆農郡

丞皆稱為郡丞然亦有稱府丞者太守既稱

府君丞亦得稱府丞郭淮傳除平原府丞呂

凱傳凱與府丞蜀郡王伉帥厲兵吏民閉境

拒闔管輅傳有清河府丞東沃沮傳徙郡句

麗西北今所謂元菟故府是也

太祖以畿為司空司直 按光武即位以武帝

故事置司直助大司徒督錄諸州蓋西京有

丞相司直光武不置丞相而有大司徒司直

官建武十一年省之劉昭注獻帝起居注云

建安八年復置司直不屬司徒掌督中都官

不領諸州九年詔司直比司隸校尉坐同席
在上假傳置從事三人書佐四人畿所居者
卽此職蓋是時以司直屬司空矣

遂詭道從郎津渡按說文解字郎恆農郡庾
地水經河水注云河之南畔夾側水濱有測
謂之涇津河北縣有涇水涇津其水南入于
河河水故有涇津之名涇郎同

杜恕傳

掇其切世大事著於篇注恕弟理年二十一而

卒子寬按恕字務伯理字務仲寬字務叔
疑皆杜畿之子注以寬爲理子疑傳寫之譌

鄭渾傳

興陂邊開稻田晉書食貨志邊作場疑與堰
同

倉慈傳

咸爲良二千石注常爲雍州十郡最按雍州
獻帝時置卽司隸所部七郡後雖有分置在
顏斐時當仍舊制十疑作七

注問其祖考而識其父乃解於署軍謀掾於
當作放趙儼傳云既囚之表府解放

于禁傳

別與史演曹仁攻眭固於射大破斬之 按大
當作大典略云眭固字白兔軍屯射犬有巫
誠固曰將軍字兔而此邑名犬兔見犬其勢
必驚宜急移去固不從遂戰死

張郃傳

郃別督諸軍降巴東巴西二郡 郡國志巴部

不分東西劉璋為牧以永寧為巴東郡墊江
為巴西郡

徐晃傳

十五年討太原反者圍大陵拔之 按此事武
帝紀在十六年夏侯淵傳在十七年之前五
字疑誤

使晃與夏侯淵平鄜夏陽餘賊 鄜當從夏侯

淵傳作鄜

李通傳

封建功侯 按建安二十年初置名號侯此建

功侯疑與漢諸侯王之崇德侯孔羨之宗聖

侯同

臧霸傳

敦利城康城陽太守 建安三年分琅邪東海

為城陽利城郡

耿純焚室輿櫬以從而光祖不逆 光祖疑當

作光武或作世祖

沛國公武周為下邳令 周竹邑人衍一公字

帝常咨訪焉注霸為休曰 為當作謂

典章傳

遷為校尉 三少帝紀作武猛校尉

龐惠傳

會勇烈有父風官至中衛將軍封列侯 按會

以平寇將軍不附諸葛誕斬門突出忠壯勇

烈由臨渭亭侯進爵鄉侯事見三少帝紀

龐清傳

遷西海太守 按晉志西海郡故屬張掖漢獻

三國志卷之

卷一

三

帝興平二年武威太守張雅請置

閭溫傳

時酒泉張華張掖張進各據其郡按張華當

作黃華下文云張進須黃華之助是其證也

武帝紀及張既傳竝作黃華

欲與恭艾并勢就至酒泉按太守馬艾已卒

故功曹張恭行長史事也艾字衍

父子著稱於西州注左棺子弟來為虎牙按

左棺疑當作唐衡後漢書趙岐傳中常侍唐

衡兄瑗為京兆虎牙都尉此注上下文皆云
衡弟而中間獨云左棺子弟非也

任城威王彰傳

子楷嗣徙封中牟按典略云太子嗣立以鄢

陵瘠薄使治中牟及帝受禪因封為中牟王

北州諸侯上下皆畏彰之剛嚴每過中牟不

敢不速傳以楷為中牟王魚豢以彰為中牟

王未知孰是

陳思王植傳

植益內不自安注官東安太守 按東安郡吳

黃武五年分三郡惡地置治富春七年罷

并其男口注足下平生有喟然有匡佐之志

句中二有字必有一誤

忍活苟全 活當从文選作垢

舍罪責功者 責文選作貴

先軌是墜 按墜當从文選作隳方與儀韻相

協

赫赫小子 當从文選作天子

優詔答之注中田絕無軌 田文選作逵

注孤獸走索羣銜艸不遑食歸鳥赴高林翩翩

厲羽翼 按文選歸鳥二句在孤獸之前

而竊位東藩爵在上列 竊位文選作位竊

退念古之投爵祿者 授當从文選作受

昔周公弔管蔡之不咸廣封懿親 按文選李

善注引馬融曰二叔管蔡也先儒鄭眾賈逵

注左氏傳竝以二叔為管叔蔡叔惟杜預則

以為傷夏殷之叔世特為創解孔穎達彌縫

其失謂馬融有此說故杜因之今觀李善所引馬注亦與鄭賈同也

是為懷懷之誠 為當从文選作臣

評後注至于植者乃令楊脩以倚注遇害 按通鑑引魚豢語至于植者下有豈能興難四字

鄧哀王冲傳

又追加號為公注今遷葬于高陵 按此高陵非馮翊屬縣也魏志諸侯王墓亦稱陵曹子

建詩逝慙陵墓及此稱高陵是也

彭城王據傳

削縣二千戶注列書載璽書曰 按列書當作

魏書中山王傳注亦有魏書載璽書云云

復所削戶邑 按據子琮為冲後範為子整後

必非無子者也本傳不言薨於何時子某嗣

又燕王宇子奐入繼大統而本傳亦不言子

某嗣俱有脫文

中山恭王袞傳

有過當奏反有善亦宜以聞 反疑當作及

又遣太妃沛王林竝就省疾 太妃杜夫人也

林與袁同母

趙王幹傳

近東平王復使屬歐壽張吏 歐當作毆說文

毆捶擊物也東平王傳作搥

楚王彪傳

初彪來朝犯禁元年為有司所奏削縣三 按

趙王幹傳云楚中山竝犯交通之禁中山獲

咎在青龍元年此元年上疑脫青龍二字

彪乃自殺 按彪之有罪賜死本紀在嘉平三

年此作元年誤

其封彪世子嘉為常山真定王 按嘉以罪人

之子紹封不應獨得二大郡疑有衍文

樂陵王茂傳

如聞茂頃來少知悔昔之非 如疑當作加

贊哀王協傳

諡曰經殤公 按協之封贊已是追封不聞改

封於經疑經字衍

北海悼王蕤傳

以琅邪王子贊奉蕤後按魏惟范陽閔王矩

之嗣王敏于太和六年改封琅邪此琅邪王

子即敏之子也子贊上當有敏字

東海定王霖傳

嘉平元年薨按本紀嘉平二年二月甲辰東

海王霖薨傳作元年疑誤

評後注自幽深宮威政讒賊威當从文選作

委

王粲傳

父謙為大將軍何進長史按謙之歷官不可

攷曹植王仲宣誄云伊君顯考奕葉佐時入

管機密朝政以治出臨朔岱庶績咸熙

後為五官將文學注奉著後序十餘篇按後

漢書應奉傳作漢書後序

自穎川邯鄲淳注又善蒼雅蟲篆許氏字指

按蒼者蒼頡篇也雅者爾雅也蟲蚪斗書篆

大小篆也許氏者即說文解字字指者劉劭傳注所謂古今字指也

陳畱路粹注與京兆嚴像荀彧傳作嚴象

時又有譙郡嵇康注河南向秀按秀河內懷人此作河南誤

劉劭傳

又以為宜制禮作學以移風俗著樂論十四篇學當作樂

傳

拜熒陽太守續漢志無熒陽郡晉志泰始二年分河南置熒陽郡嵇為郡守尚在少帝時蓋魏代置而旋罷耳

陳羣傳

以軍事未罷顧眾議故且寢時魏因難以藩國改漢朝之制故寢其議

徐宣傳

帝即位封津陽亭侯帝上疑脫明字

衛臻傳

輒遣使祠焉注資以烈節垂名 資當作茲臻

父名

盧毓傳

邑二千三百 三百下脫戶字

諡曰成侯孫藩嗣 按本傳毓封高樂亭侯進

封大梁鄉侯進爵容成侯高貴鄉公即位封

一子高亭侯而晉書盧欽傳曰欽父毓欽襲

父爵大利亭侯以吏部尚書進封大梁侯卒

于浮嗣魏志作孫藩嗣晉書作子欽嗣魏志

作容城侯晉書作大梁侯二說不同予竊疑

藩所嗣封者容成侯也欽所封者即魏志所

謂封一子高亭侯是也晉書蓋誤併二侯為

一故與承祚不合

和洽傳

不可以一節儉也 按下文云今崇一概難堪

之行以檢殊塗即此意儉當作檢

明帝聞之加賜穀帛 按上文已云太和中矣

此明字衍文

洽同郡許混者注劭宗人許栩沈沒榮利致位

司徒按許栩後漢書許劭傳作許相相與

栩並為司徒字形又相近未知孰是

常林傳

超遷博陵太守按博陵郡延熹元年分中山

河間安平置

趙儼傳

遣使招誘豫州諸郡諸郡多受其命唯陽安郡

不動而都尉李通急錄戶調按陽安縣本

屬汝南郡晉志無陽安郡惟魏志李通傳有

陽安都尉劉昭注續漢志引魏氏春秋云初

平三年分二縣置陽安都尉蓋大郡置太守

小郡則置都尉也通稱亦曰太守故魏略云

儼與領陽安太守李通同治

以儼領章陵太守按章陵縣屬南陽郡晉宋

諸志不載章陵置罷之事

裴潛傳

子秀嗣注封廣川侯廣疑當作濟晉書裴秀

傳云以高苑縣濟川墟為侯國

注李義子豐字宜國 按夏侯泰初傳注亦引

典略李豐字安國與此不同

韓暨傳

舊時治作馬排 按後漢書杜詩傳云造作水

排鑄為農器用力少見功多百姓便之暨又

以馬為之

崔林傳

遷大鴻臚轉光祿勳司隸校尉 按明帝紀注

引獻帝傳云使持節行司空大司農崔林監
護喪事是青龍二年林為大司農也史不備

書

高柔傳

以柔為管長 管疑作營屬濟南郡

孫禮傳

遷陽平太守 按黃初二年以魏郡東郡為陽

平郡

辛毗傳

三國志辨疑 卷一
子微嗣注外孫更侯湛 更疑當作夏
楊阜傳

阜外兄姜敘屯歷城注松之按皇甫謐列女傳
稱阜爲敘姑子而本傳云敘爲阜外兄與今
名內外爲不同 按高幹爲袁紹外甥而牽
招傳云尙外兄高幹以是例之敘當以阜爲
外兄疑傳之誤非古今異稱也

十七年九月與敘起兵於鹵城 按武帝紀及
夏侯淵傳作十九年此七字疑誤

曩使桓靈不廢高祖之法文景之恭儉 法字
上下疑有脫字

高堂隆傳

遷陳留太守犢民酉牧年七十餘 按犢民非

縣名疑是尉氏之譌

隆又以爲宜改正朔易服色 隆議詳見宋書

禮志

生廉侔伯夷直過史魚 按明帝不稱隆名而

稱爲生直以先生尊之矣下云天不欲成吾

事高生舍我亡也亦此意

纂成洪緒宜崇晏晏 堯典文思安安尚書考

靈耀作文塞晏晏

由枝幹既朽本實先拔也 古拔與撥通用

田豫傳

追豫到馬城圍之十重 按馬城魏氏春秋作

馬邑故城見劉放傳注

王基傳

出為安豐太守 安豐郡文帝時置

許允傳 袁侃崔贊皆一時正士 按傳 許允

有傳 袁侃袁渙子附渙傳 許允崔贊並見夏

侯泰初傳

王凌傳

會愚病死注故愚與王浚陰謀立楚王 浚當

作凌

毋邱儉傳

句驪王宮 按宮當作位宮 句驪人稱相似為

位以其似曾祖宮故名位宮

銘不耐之城 不耐城屬東沃沮

諸葛誕傳

為熒陽令注與僕射杜畿試船陶河 畿當作

畿

諸葛恪與東關 卽會眾於東興更作大隄事

鍾會傳

參軍爰彭 爰彭疑卽爰劭之子倩也倩字君

幼見荀綽冀州記

烈軍兵與烈兒雷鼓出門 烈兒名淵字世元

胡遵之孫也晉書稱其字避唐高祖諱也此不知何以稱為烈兒

將士死者數百人注至車騎將軍 按晉諸公

贊但言遵為車騎將軍晉書胡奮傳言遵封

陰密侯

鮮卑傳

注施法禁曲直 范書作平曲直此疑脫平字

滅傳

朝鮮侯淮 淮范史及裴引典略竝作準

韓傳

莫盧國古臘國 按莫盧國已見上文此重出

辰韓東方人各我為阿 按後人名我為俺

即阿也聲之轉耳

弁辰次有借邑 按上文敘馬韓作邑借范史

同

倭人詔書我甚哀汝 哀當作哀下文使知國

家哀汝故鄭重賜汝好物也

三國志辨疑卷一終

三國志辨疑卷二

嘉定錢大昭晦之撰 孫男師璟賦梅謹刊

蜀

劉二牧傳

璋累遣龐羲等攻魯所破 范書攻魯下有數

為二字

領兵禦魯注故障厚德義以義為巴西太守

二義皆當作義

評聽相者之言則求婚吳氏 求婚事見先主

穆皇后傳

先主傳

叔父子敬謂曰汝勿妄語 按扶風孟達字子

敬避先主叔父敬改爲子度見劉封傳

羣下推先主爲荊州牧治公安 按荊州刺史

治武陵漢壽先主爲牧改治公安

二十三年分遣將軍吳蘭雷同入武都 按

武帝紀有任夔而無雷同

二十四年大破淵軍斬淵郤 按張郃至明帝

時尚在其不斃于陽平之役明矣郤本傳亦
但言淵爲備所殺也此郤字衍因上文淵郤
竝舉而誤

左將軍領長史鎮軍將軍臣許靖 按靖爲左
將軍長史在建安十九年此領字疑當在鎮
軍之上

議曹從事中郎軍議中郎將臣射援注三輔決
錄注云其先本姓謝始祖謝服爲將軍出征
天子以謝服非令名改爲射子孫氏焉 按

射與謝古字通用漢書功臣侯表甯陵侯表
史記作射是其證摯虞不識古文采此妄說
猶是氏古通以氏為民無上乃戲謔之詞非
是儀之惡此而改是也承祚亦信此說過矣
章武三年時年六十三注射君到 射君即射
文雄

後主傳

後主諱禪字公嗣 後主小字阿斗見劉封傳
評軍旅屢興而赦不妄下不亦卓乎 按赦不

妄下亦謂諸葛亮為相時耳亮卒之後延熙
元年六年九年十四年十七年二十年景耀
元年四年皆大赦矣孟光責費禕以為赦者
偏枯之物非明世所宜有衰敝窮極不得已
然後乃可權而行之今有何且夕之危倒懸
之急而數施非常之恩以惠姦宄之惡不其
然哉

二主妃子傳

孝愍皇帝亦改葬其母王夫人尊號曰靈懷皇

三國志卷之二十一
后 按孝愍皇帝即漢獻帝也在章武元年
獻帝見害追謚孝愍猶可託之傳聞至後主
嗣位已閱二年之久山陽公之存歿豈不知
之而猶稱爲孝愍皇帝者不過欲因此以討
魏室篡弑之罪有以藉口耳不然獻帝見在
大敵未克而元德晏然自立嗣王繼體踐阼
雖曰漢帝子孫與魏文之僭位何以異乎所
謂掩耳盜鈴也
論其親疏何與晉文之於子圍乎
何與猶言

何如
諸葛亮傳

惟博陵崔州平注太尉列子均之弟也 當從
後漢書作烈子鈞之弟
侍中侍郎郭攸之費禕董允等 按三人中惟
郭攸之無傳攸之字演長南陽人後爲中郎
於是以亮爲右將軍行丞相事所總統如前注
劉繇王朗各據州郡 按劉繇爲豫章太守
在興平中王朗爲會稽太守在建安初又云

使孫策坐大遂并江東孫討逆卒於建安五

年據魏春秋此疏上于孫權破曹休之時蓋

建興五年也蜀建興五年即魏太和元年相隔二三十年

不必贅及且云任用李服而李服圖之魏志

亦無此人竊疑是表後人偽撰習鑿齒未之

深考而載之耳承祚不采此文極有卓見

宗覈下第八宗當作綜

諸葛喬傳

隨亮至漢中年二十五建興元年卒 按霍峻

傳云亮北駐漢中請為記室使與子喬共周

旋游處與喬傳合然北駐漢中之事後主傳

及諸葛亮向朗等傳皆在建興五年則所云

建興元年卒者誤矣

諸葛瞻傳

為翰林中郎將 翰疑當作羽

代陳祗為尚書令遷大將軍平臺事 按後主

傳及姜維傳竝云輔國大將軍董厥此脫輔

國二字

張飛傳

進封西鄉侯策曰 史于諸葛亮張飛馬超許
靖竝載策文餘俱不載

黃忠傳

欲用忠為後將軍諸葛亮說先主曰忠之名望
素非關馬之倫也而今便令同列馬張在近
親見其功尚可喻指關遙聞之恐必不悅
按兩漢將軍以大將軍驃騎將軍車騎將軍
衛將軍前後左右將軍為貴張飛為車騎馬

超為驃騎尙在章武元年拜忠詩先主方為
漢中王尙未設車騎驃騎等官惟以前後左
右為重也時關為前將軍馬為左將軍張為
右將軍今以忠為後將軍故云同列費詩傳
云遣詩拜羽為前將軍關聞忠為後將軍怒
曰大丈夫終不與老兵同列不肯拜受詩解
之乃受拜則盪寇之意孔明已料之審矣

龐統傳

統子宏卒於涪陵太守 按洪适隸續有漢故

涪陵太守龐玄神道碑宏即玄也當以碑為正

法正傳

右扶風郿人也

右字衍文

許靖傳

董卓秉政以漢陽周毖為吏部尚書

按西漢

置尚書四人分為四曹曰常侍曹曰二千石

曹曰民曹曰客曹世祖承遵後分二千石曹

又分客曹為南主客曹北主客曹靈帝以待

中梁鵠為選部尚書非吏部也至曹魏時始

改選部為吏部主選部事獻帝時尚未有吏

部尚書疑傳寫之誤

蔡質漢儀云世祖改常侍曹為吏曹亦非吏部

又傳以毖為漢陽人董卓傳注引英雄記以

毖為武威人未知孰是

秦宓傳

仲尼嚴平會聚眾書以成春秋指歸之文

隋書經籍志嚴遵有老子指歸十一卷陸德明

作十四卷嚴平即嚴君平也

嚴君平見黃老作指歸嚴氏於黃帝書未見

指歸之作疑因老而運及黃耳

呂父傳

後校尉王連請父及南陽杜祺南鄉劉幹等並
為典曹都尉 按南鄉郡魏武分南陽西郡

置典曹疑典農之譌

劉封傳

以耽弟儀為建信將軍西城太守 按建安二
十年魏武分漢中之安陽西城為西城郡時
先主已平劉璋故西城屬蜀漢

廖立傳

如向朗文恭凡俗之人耳恭作治中無綱紀

按常璩華陽國志云丞相參軍文恭字仲寶

梓潼人

李嚴傳

平遣參軍狐忠 狐忠即馬忠

豐官至朱提太守 按朱提郡先主定蜀以犍

為屬國置

楊儀傳

三國志卷之六十一

背羣而詣襄陽太守關羽 按建武十三年魏

武分南郡以北置襄陽郡盜寇為太守時郡

已西屬

霍峻傳

乃分廣漢為梓潼郡以峻為梓潼太守 按分

郡在建安二十二年

後為參軍庾亮降屯副貳都督 按庾亮地名馬

忠傳云故都督常駐平夷縣至忠乃移治味

縣季漢輔臣贊注云其治在朱提郡南昌縣

鄧方李恢張翼馬忠皆嘗為庾亮降都督

向朗傳

以朗為巴西太守頃之轉任梓潼又徙房陵

按巴西郡建安六年劉璋分巴西郡墊江置又

房陵郡晉志所無不知置于何時劉封傳建

安二十四年命達從秭歸北攻房陵房陵太

守蒯祺為達所害

楊洪傳

漢嘉太守黃元 按漢嘉為蜀郡屬國所領靈

帝時以蜀郡屬國為漢嘉郡後又省之至章武元年復置也

嚴未至犍為而洪已為蜀郡 至疑當作去以

下文時洪亦尚在蜀郡尋之可見

費詩傳

今漢王以一時之功隆崇於漢室 漢王漢中

王也黃忠字漢升此漢室二字當作漢升

杜微傳

杜微字國輔 季漢輔臣贊作輔國

周羣傳

周羣字仲直 季漢輔臣贊作宣

遣將軍吳蘭雷銅等入武都 先主傳作雷同

郤正傳

祖父儉靈帝末為益州刺史為盜賊所殺 接

儉賦斂煩擾貪殘放濫詳見劉二牧傳及劉

艾靈帝紀盜賊謂涼州馬相趙祗也

泰始中除安陽令遷巴西太守泰始八年詔曰

正昔在成都頗沛守義不違忠節及見受用

盡心幹事有治理之績其以正為巴西太守
咸寧四年卒 按泰始中以下五十七字皆
入晉後事志不必載

黃權傳

若失漢中則三巴不振 漢中為益州咽喉最
稱要害故楊洪亦以為若無漢中則無蜀矣
按初平六年以臨江屬永寧郡建安六年劉
璋改永寧為巴東郡分巴郡墊江置巴西郡
合之巴郡是為三巴也

李恢傳

任郡督郵姑夫爨習為建伶令注華陽國志云
習後官至領軍 按建興九年習為行參軍
偏將軍見李嚴傳注

呂凱傳

吳遙署闔為永昌太守 永昌郡在益州郡西
非吳所有也故云遙署蜀楊儀亦遙署恆農
太守

以凱為雲南太守 按雲南郡建興二年分建

寧永昌置

馬忠傳

封博陽亭侯進封彭鄉亭侯 彭鄉下亭字衍

文

閻宇宿有功幹於事精勤 按閻宇後主時為

右大將軍都督巴東為領軍見襄陽記

張嶷傳

巴西郡南充國人也 郡國二字疑皆衍文

郡有舊道經旄牛中至成都既平且近自旄牛

絕道已百餘年更由安上既險且遠 郡越

嵩郡也安上縣去郡八百餘里故云險遠

蔣琬傳

弱冠與外弟泉陵劉敏俱知名 泉陵與湘鄉

同屬零陵敏於建興九年為行右護軍偏將軍

五年亮位漢中 位疑當作住

費禕傳

依族父伯仁伯仁姑益州牧劉璋之母也璋遣

使迎仁仁將禕遊學入蜀 上言伯仁下單

言仁非史例也

以禕為照信校尉 按照疑昭之譌吳呂岱為

昭信中郎將亦其類也

姜維傳

拔河間狄道臨洮三縣 按河間當作河關隴

西郡所屬

鄧芝傳

子良晉朝廣漢太守 此敘蜀事不必說到晉

三國志辨疑卷二終

三國志辨疑卷三

嘉定錢大昭晦之撰 孫男師璟賦梅謹刊

吳

孫破虜討逆傳

會稽妖賊許昌起於句章與其子韶扇動諸縣

按後漢書靈帝紀熹平元年會稽人許生

自稱越王寇郡縣注引東觀記云會稽許昭

聚眾自稱大將軍立父生為越王攻破郡縣

是范史以昌為生東觀又以韶為昭與此不

同

漢遣車騎將軍皇甫嵩中郎將朱儁將兵討擊之 按范書皇甫嵩傳嵩以北地太守為左中郎將與右中郎將朱儁共討潁川黃巾黃巾已平乃拜左車騎將軍此時尚未為車騎也疑傳有誤

上拜堅別部司馬注進臣所急 當從後漢書作言所非急

溫不忍發舉乃曰君且還 張溫不聽破虜之

言即斬董卓致令職為亂階小不忍乃亂大謀矣

吳主傳

建安十五年分豫章為鄱陽郡 郡治鄱陽縣

赤烏八年徙治吳芮故城

分長沙為漢昌郡 漢志無漢昌縣隸釋周憬

碑陰有長沙漢昌塞祗字宣節碑立于靈帝

熹平時則此縣必桓靈時置也至是時又立

為郡

二十五年是用錫君軒縣之樂又虎賁之士百人按此九錫文與權授公孫淵九錫同若魏晉九錫皆云軒縣之樂六佾之舞虎賁之士三百人

遣都尉趙咨使魏注咨字德度南陽人按魏志司馬朗傳有趙咨亦字德度河內溫人此別是一人

黃武四年丞相孫邵卒自孫邵至濮陽興皆為丞相至寶鼎元年以陸凱為左丞相常侍

萬彧為右丞相始分為左右兩相矣

五年陸遜又云忠讜之言不能極陳不能疑是不敢尋下文可見

是歲分交州置廣州按士燮傳分合浦以北為廣州交阯以南為交州呂岱傳海南三郡為交州海東四郡為廣州

黃龍元年吳王太子登為皇太子是時妙選俊彥講學左右顧譚為輔正都尉陳表為翼正都尉諸葛恪為左輔都尉張休為右弼都

尉

二年會稽東縣人海行亦有遭風移徙至宜州者 按東縣當作東冶見魏志王朗傳

赤烏元年初權信任校事呂壹 按步騭傳云後中書呂壹典校文書多所糾舉騭疏云伏聞諸典校撻挾細微吹毛求疵重按深誣趣欲陷人無罪無辜橫受大刑

二年祕所領都督廖式殺臨賀太守嚴綱等按臨賀郡大帝分蒼梧置

五年以兵三萬討珠崖儋耳 按珠崖郡即于是年復置其儋耳郡自漢昭帝既罷之後不知復置于何時吳郡陸凱赤烏中為儋耳太守

九年以驃騎步騭為丞相車騎朱然為左大司馬鎮南呂岱為上大將軍 按此篇雖為列傳當從本紀之例不可不謹嚴齊整也驃騎車騎鎮南下皆當有將軍二字又三嗣主傳太平元年驃騎呂據車騎劉纂鎮南朱異永

安七年鎮軍陸凱撫軍步協亦不應省將軍二字

十一年二月 晉志是年二月白虹貫日

太元元年初臨海羅陽縣有神自稱王表注吳

錄曰羅陽今安固縣 按晉志有臨海郡無

羅陽縣晉明帝太寧元年分臨海為永嘉郡

宋州郡志永嘉所屬有安固縣云吳立曰羅

陽孫皓改曰安陽晉武帝太康元年更名攷

三嗣主傳太平二年分會稽東部為臨海郡

吳大帝時尙未有此郡蓋追書之耳

三嗣主傳

從中書郎射慈郎中盛冲受學 按孫奮傳傳

相謝慈等諫奮奮殺之注云慈字孝宗彭城

人疑卽此射慈也射謝古字通用

永安元年武衛將軍恩為御史大夫 按大帝

時未見有御史大夫之職孫休蓋特置以寵

異孫恩耳至五年又以廷尉丁密光祿勳孟

宗為左右御史大夫

三年以會稽南郡為建安郡 南郡當作南部
 分宜都置建平郡 宋志云領信陵興山秭歸
 沙渠四縣信陵興山沙渠疑是吳立
 元興元年封休太子翬為豫章王次子汝南王
 次子梁王次子陳王 按班史於諸王書立
 書薨紀其年月日且作表以經緯之最為盡
 善後之作史者所當法也吳志中諸王惟赤
 烏五年書立子霸為魯王太元二年立故太
 子和為南陽王子奮為齊王休為琅邪王皆

書名自是以後或地而不名或名地俱缺此
 條太子以下三人即震詎寇也並不書外如
 建衡元年立子瑾為太子及淮陽東平王鳳
 皇二年改封淮陽為魯東平為齊又封陳留
 章陵等九王天紀二年立成紀宣威等十二
 王四年立中山代等十一王皆是也而於蜀
 漢則章武元年以子永為魯王理為梁王建
 興八年徙魯王永為甘陵王梁王理為安平
 王延熙元年立子瑤為安定王十五年立子

琮為西河王十九年立子瓚為新平王景耀二年立子諶為北地王恂為新興王虔為上黨王皆備書之而西河王琮并書其卒何詳略之不均也若云抑吳而不書則霸奮等又何以書若云闕疑而不書則承祚作志時又未至文獻無徵也

寶鼎元年永安山賊施但等 宋志吳分烏程

餘杭立永安縣晉太康元年更名武康

建衡三年司空孟仁卒注仁本名宗避皓字易

焉 按古者諱名不諱字皓字元宗似可無避然吳錄載休詔曰今造此名字既不相配又字但一庶易棄避則孫吳時有避字之理矣

劉繇傳

繇伯父寵為漢太尉注繇祖父本 本范史劉

寵傳作平

漢命加繇為牧振武將軍 范史寵傳作振威

遷基大農 按大下疑有司字虞翻張溫傳並

作大司農

太史慈傳

推涇以西六縣未服 推當作惟

策命慈往撫安焉注今兒子在豫章未知華子

魚待遇何如 時華欲為豫章太守故有是

言

士燮傳

而荊州牧劉表遣零陵賴恭代津 按賴恭為

先主鎮遠將軍官至太常

是時蒼梧太守史璜死表又遣吳巨代之 按

薛綜步騭傳亦作吳巨惟蜀先主傳注引江

表傳作吳巨疑誤

妃嬪傳

孫破虜吳夫人生四男一女 按諸葛瑾傳云

孫權姊婿曲阿宏咨見而異之疑即此一女

之夫也

夫人助治軍國甚有補益注魏公曹在公盡規

按公曹當作功曹謂魏騰也因下文公字

而誤

吳主步夫人 今使使持節丞相醴陵亭侯雍

奉策授號 按顧雍傳雍初封陽遂鄉侯進

封醴陵侯永安元年詔以雍子裕襲醴陵侯

蓋由鄉侯進封縣侯也此亭字衍文

宗室傳

瑜字仲異 以下文孫皎孫奐例之此瑜字上

亦當有孫字

弟咨彌儀皆將軍封侯咨羽林督儀無難督咨

為滕胤所殺 按皎與瑜皆孫靜之子瑜子

名彌則皎子必不同名且下文但云咨儀並

不及彌疑彌字衍文

孫松黃龍三年卒蜀丞相諸葛亮與兄瑾書曰

既受東朝厚遇依依於子弟又子喬良器為

之惻愴見其所與亮器物感用流涕其悼松

如此由亮養子喬咨述故云 按子喬疑是

松之字也亮兄瑾子喬自吳至蜀故咨述松

而亮傷之也亮以喬為已適子當云兄子不

得謂之養子

張昭傳

為共作樂耳公何怒乎 按江表傳初權與屬

多呼其字惟呼張昭曰張公本傳權歎曰使

張公在坐彼不折自廢又曰孤與張公言不

敢妄也又諸葛恪傳權曰卿其能令張公詞

屈乃當飲之耳皆稱為公顧雅大帝亦嘗稱公曰顧公在坐令人不

樂

按彭城蔡款注款字文德

按周昭論作蔡文

至與吳錄互異

步騭傳

會稽焦征羌郡之豪族 按史家敘事例得稱

名志中如蔡伯喈魯劉子奇陶司馬德操徽

宋仲子忠劉伯安虞許文休靖任定祖安秦

子勅必之類不可枚舉此又稱其官更非史

例臧洪傳稱劉兗州公山岱孔豫州公緒仲

則又官字並舉尤為變格也

猶或緬焉未之能詳 按緬猶泯也言泯焉未

之能詳審

近漢高祖擊三傑以興帝業 漢三傑之稱始

此謂蕭何韓信張良也

十一年卒子協嗣 按吳主傳步騭卒于赤烏

十年五月一字疑衍

張紘傳

少游學京師注治繚氏易 繚疑當作京

薛綜傳

趙佗起番禺懷服百越之君珠官之南是也

按珠官郡卽合浦也黃武七年更名朱志云

孫亮復舊

九真太守儋明 以下文證之明當爲萌

建昌侯慮爲鎮軍大將軍屯半州 按半州地

名孫慮傳假節開府治半州甘寧傳注因令

寧將兵遂移屯於半州潘璋傳遂領百校屯

半州朱績傳恪向新城要績并力而留置半

州

魯肅傳

拜漢昌太守 按吳主傳建安十五年分長沙為漢昌郡

呂蒙傳

汝南富陂人也 陂疑當作波

蒙乃薦寧為升城督 吳有無難督解煩督濡

須督西陵督江陵督公安督巴邱督

郝子太閻世間有忠義事 按楊戲輔臣贊郝

普字子大此太字誤下同

程普傳

增兵二千騎五十四 四疑當作匹

韓當傳

將敢死及解煩兵萬人討丹陽賊破之 按解

煩兵猶陳表傳言無難士也張溫傳特以繞

帳帳下解煩兵五千人付之陳脩嘗為解煩

督胡綜傳立解煩兩部詳領左部綜領右部

督

董襲傳

時山陰宿賊黃龍羅周勃聚黨數千人 以下

文斬羅勃首證之周字疑衍

討虜承基大小用命 建安五年曹公表權為

討虜將軍故有是稱

甘寧傳

拜西陵太守 按西陵江夏郡所治也建置未

久旋即并省故晉志無此郡

朱治傳

初權弟翊性峭急喜怒快意治數責數諭以道

義 按治為翊舉主

朱桓傳

遣將軍常雕 駱統傳同吳主傳常彫古字通

鄱陽太守周魴 鄱陽郡建安十五年分豫章

置

虞翻傳

汜弟忠宜都太守 宜都郡蜀主分南郡置備

放後屬吳

張溫傳

會暨豔事起 按豔事詳見此傳而陸瑄朱據

傳皆言及之失之繁矣

駱統傳

出為建忠郎將 建忠下疑脫中字

陸瑁傳

丞相遜弟也 按陸績傳既在同卷中此當云

績從子下卷陸遜傳當云瑁兄承祚于遜則

書里居于瑁則書遜弟疑其真倒失次

陸遜傳

又攻南鄉太守郭睦 按南鄉郡建安十三年

魏武分南陽西界立二十四年屬蜀故遜攻之

陸抗傳

自關羽至白帝 白帝下疑有瀨字

況臣王室之出 抗為桓王外孫故云

吳主五子傳

尚書僕射存上疏 史失其姓建衡元年有督

軍徐存與監軍李勛從建安海道擊交阯未

知是否

孫皓左夫人王氏卒 按妃嬪傳注引江表傳

則以左夫人為張昭之女即所奪衛尉馮朝

子純妻也此云王氏為不同矣

賀齊傳

齊復表分歙為新定黎陽休陽并黟歙凡六縣

權遂割為新都郡 按新都建郡已見大帝

傳此處可省

全琮傳

十二年卒 琮卒于赤烏十年正月見吳主傳

二字疑衍

陸凱傳

姚信樓元賀邵張悌郭遠薛瑩滕修及族弟喜

抗 按姚信寶鼎二年為太常張悌字巨先

襄陽人見孫皓傳郭遠未詳薛瑩附綜傳陸

喜附瑁傳元邵抗自有傳滕修疑即滕循孫

皓傳執金吾滕循為司空

胡綜傳

黃龍見舉口 舉口當從吳主傳作夏口

滕承嗣傳

夜省文書或通曉不寐 按此傳未全疑有脫

文

男繹子樂校字

孫師璟度覆校

三國志辨疑卷三終

三國志辨疑跋

先大父徵君三國志辨疑三卷從祖宮詹公序
 云用力精微實事求是近儒何肥瞻陳少章未
 能或之先也師璟不幸生四歲而孤祖視一方
 父書百卷時慮不學廢墜家修歲舍庚子正月
 伯父小廬先生語曰徵君著述十種已刊敘例
 全書清本向因伯父季弟南北宦遊予為謹守
 今境迫崦嵫盡揀奉付汝弟師度以副本歸汝
 汝其實之若得付梓行世是予之深願也師璟

志之不敢忘甲辰孟夏先將此書剞劂以質海
內醇儒碩士喜讀我先徵君書者刊成謹志如
右孫男師璟敬書

前父小童先主部曰遠哲善也十餘年何文四
父善百卷非應不學發善不學父合其氏五日
游海之武也則歎不幸主四游而加加一
三國志辨疑卷三終

三國志辨疑卷三終

